

SCHWEIZ : UKRAINE

(NACH PENALTY SCHIESSEN)

0:3

2. «Das war Tells Geschoss!»
(Barnetta der Stille)

3. «Durch diese hohle Gasse
muss er kommen!»
(Richard Cabanas)

1. «Rasch tritt der Tod den Menschen an,
Es ist ihm keine Frist gegeben,
Es stürzt ihn mitten in der Bahn,
Es reißt ihn fort vom vollen Leben,
Bereitet oder nicht, zu gehen,
Er muß vor seinen Richter stehen.»
(Markus Streller)

Dr Schiller liegt!

DAS BÜHNENSTÜCK «TELL» FREI NACH SCHILLER IN 3 (VON 5) AKTEN

Dr Wilhelm Tell, dä isch ä Star,
das isch für d'Schwizer sunneklar.
Er schiesst glatt vom Walti sim Schopf
ä Oepfel wäg - dä armi Tropf.
Es wird vom Schiller guet beschriebe,
wie me dr Gessler het vertriebe.

Sithär wüsse alli:

**Mir Schwizer traffe nach Bedarf
und schiesse immer richtig scharf!**

Doch, sit churzem die n'is Zwiefel ploge,
mir stelle nis ä huffe schweri Froge.
Mir Schwizer traffe mässerscharf
genau drnäbe, ganz nach Bedarf:

Wär trifft dr Ginter i dr Bleiholle a?
Het's in «Laufe trifft Laufe» volli Laufner gha?
Wenn breicht ä Jeger bim Jage no Hase?
Bruucht dr FC zum Träffe ä Kunschtrase?
Wenn breicht ä Ma mol d'WC-Schüssle?
Wenn stoppt dr Schischi s'Ummerüssle?
Wenn hets i dr Badi warm Wasser gha?
Trifft me d'Bos uf dr Rütschbahn a?
Wenn wird s'Träffe Koch-Sabo si?
Wenn trifft d'SBB mol pünklich i?
Het d'Pegoraro d'Wohret troffe?
Wär het Zielwasser vom Goetschy gsoffe?
Wär nimmt s'Gwehr für ä «Pick» füre?
Wieso schiesst ä Chue i-n'ä Coiffeur-Türe?

A dr WM merggsch's denn ohni Froge,
dr Schiller het doch eifach gloge:

Für dä Matsch gege d'Ukraine
nehm-t-me besser ölf Blondine.
Die si bim Schutte eifach riifer
und s'mech das Ganze attraktiver.

Am Färnseh duet me nüt verpasse,
me chönnt grad so guet id Beiz go jasse.
Wenigschtens muess me nit pressiere,
o wenn me zähmol goht go uriniere.

S'Penalty-Schiesse isch denn s'Beschte,
alli miesse d'Närve teschte.
Dr Streller duet mit dr Zunge flattere
und loht d'Ballä uf ä Goali rattere.
Dr Barnetta meint s'Gool sig gross wie ne Halle
und duet si Schuss a d'Latte knalle.
Dr Cabanas zeigt im Gooli a,
«ig schiess linggs vo dir, nit uf ä Ma».

Do druss muess me schliesse:

Mir Schwyzer chönne keini Träffer lande!
Dr Tell, dä het gar nie bestande!
Mir chönne keini scharfe Schüss entfache!
Mit em Tell chasch nit mol Wahlkampf mache!
Sogar d'SVP fingt ihn nüm wirklich heiss
und ersetzt ihn dur n'e wissi Geiss.

Und das isch die wohri Gschicht:

**Dr Tell zielt schön über Walterlis Schopf
und trifft us Verseh'm Gessler si Chopf!**

Fasnacht 2007

NASEGRÜBLERGUGGE
LAUFEN1984